

四庫全書

史部

欽定四庫全書

史部

三朝北盟會編卷一百一

一至六

詳校官庶吉士臣張溥

編修臣裴謙覆勘

總校官檢討臣何思鈞

校對官中書臣楊世綸

謄錄監生臣楊文憲

欽定四庫全書

三朝北盟會編卷一百一

宋 徐夢莘 撰

炎興下帙

起建炎元年五月一日庚寅盡其日

建炎元年五月一日庚寅朔大元帥即皇帝位於南京

汪伯彥中興日曆曰先是四月二十七日元祐皇后

諡令遣玉時雍徐秉哲脩車駕法仗等百官庶務各分

一半發船載宮嬪及張邦昌等前赴南京迎請又命內侍邵成章王充管押乘輿服御御輦儀仗至南京來迎王坐便廳南仲伯彥潛善延禧耘世則皆侍立成章等捧筭以前點數名件內有道冠一頂非人間樣制成章等拱以捧曰太母傳語此冠自祖宗以來凡退朝宴閒不戴頭巾只戴此冠後來神宗皇帝易以頭巾脩襲至哲宗皇帝道君皇帝非祖宗制也願殿下即位後退朝宴閒戴此冠便是祖宗太平氣象王歛容涕流曰上天

眷命羣臣愛戴幕屬將佐上書勸進拜叩固請至於五
六吾固辭者亦屢矣方此躊躇以思繼又奉太上皇帝
即真之詔太母乘輿服御之意迫不得已不敢欽承於
是命尅擇官選得五月一日庚寅命有司於南京譙門
之左營築壇場命朱勝非撰策文告天命滕康撰赦文
肆赦五月一日庚寅登壇寅受天命南仲克禮儀使延
禧讀冊告天汪伯彥黃潛善董耘高世則元帥府僚屬
皆登壇行事王泣涕即皇帝位於應天府治之正衙南

仲伯彥潛善延禧耘世則等先稱賀上殿侍立張邦昌
率百官稱賀改元建炎元年 初議改元命幕府官屬
聚議耿南仲等議曰王者即位求端於天探一元之意
以正本始故必建元故漢光武中興建武大王再造王
室宜用光武故事紀元恭惟藝祖皇帝誕彌之年太歲
丁亥大王殿下誕彌歲亦丁亥天元屬火宋以炎德王
藝祖開基改元建隆累聖相授逮至靖康乃遭中微殿
下紹隆益光前烈南仲等請以改元為建炎 耿延禧

中興記曰初議年號黃潛善定為炎興耿南仲曰此蜀
年號遂為建炎大赦天下 門下皇天祐宋卜世過於
漢唐藝祖承周受禪同乎舜禹列聖嗣無彊之厯保邦
隆不拔之基屬以朝奸稔成邊釁恃中都之安富忘外
敵之憑陵致金人來攻京邑初登城而不下終邀駕以
偕行痛念鑾輿遠征沙漠宗族從而盡徙宮闕為之一
空仍仰臣僚俾偕位號朕以介弟之親而受旨開元帥
之府以總師方輸敵愾之忠亟奉講和之詔豈圖變故

終致阽危蓋嘗指日以誓諸軍使前迎而後請不憚戴
星而檄率土冀外附而內親而三事大夫與萬邦黎猷
共致樂推之懇靡容牢避之私謂疊疊萬機難以一日
而曠位矧皇皇四海詎可三月而無君勉狗羣情嗣登
大寶宵衣旰食紹祖宗垂創之基疾首痛心懷父兄播
遷之難顧號令久隔衆罔係心軍旅荐興農多失業慰
民耳目之注敷朕腹心之言爰布湛恩誕綏區夏可大
赦天下應赦書到日昧爽以前罪人所犯罪無輕重已

發覺未發覺已結證未結證常赦所不原者咸赦除之
朕惟火德中微天命未改考光武紀元之制紹建隆開
國之基用赫丕圖益光前烈可以靖康二年五月一日
改為建炎元年一二帝北狩隨行官吏班直諸軍及諸
色人等見有家屬並依舊支破請給常切存恤無令失
所昨金人逼脅使張邦昌僭號實非本心今已歸復舊
班其應干供奉行使之人亦不獲已尚慮畏避各不自
安其已前罪犯並與放免一切不問一應緣金人犯闕

歿於王事軍人祖父母妻篤疾及年七十以上家無子孫者委所在勘會詣實時與支本營小分請受如陣亡人依格合給多者即從多給一應永安軍祖宗陵寢西京應天禪院會聖宮影殿西墳可差西京留守及臺臣一員日下前去躬親省視如有歷年久遠為風雨之所剝蝕及軍馬之所蹂躪牆垣傾頽棟宇殘損采色黯舊合修理者一面措置修理之不得有所遺失母惜重費毋畏勞苦務期完密以稱脫意俟事竣日

仍密具奏聞南墳委汝州守臣依此一應天下神霄宮並
罷舍屋什物錢糧田產州縣拘收具數申尚書省一應
常平司散歛青苗錢穀本以便民歲久法弊反為民患
可自今住罷一應緣軍馬侵犯有臨難死節義不受辱
出使軍前及守禦出戰並歿於王事許本家經所在官
司自陳先次覈實具名保明聞奏當議優與褒賞訪聞
自來歿於王事合得恩數官司多事指摘細故非理問
難逗留致死事者不即霑恩可令所屬疾速施行一應

緣金人大入朝廷遣使往來實厯險難有未經推恩人
許令自陳與檢詳元指揮推恩內有金人拘留未還者
其請給令所屬且權給一半贍養其家俟及一年止一
應因金人驅擁及差使過軍州官員及諸色人等得還
者並許依舊官職祇應支破請給等內官員已別差人
者並令吏部先次別與一般差遣一應文臣承務郎武
臣承信郎以上并內官醫官伎術官及致仕並與轉行
一官文臣中大夫武臣承宣使並回授與本官有官有

服親武功大夫未帶遙郡一官已帶遙郡禦使人與轉
行右武大夫選人與循資已係承直郎與改官次等合
入官校副尉下班祇應依格與轉官資仍並不隔磨勘
一應諸路帥守監司許依例進貢恩其金人及盜賊曾
失守或逃避之人不許進貢一應承務郎以上服綠服
緋及十五年者不以贓私罪與轉服色一應文武陞朝
官并禁軍都虞候以上父母妻未有官封者並與封叙
已封叙者更與封叙亡歿者與封贈已封贈者更與封

贈祖父母者亦聽回授一應文武致仕官並賜粟帛羊酒即曾任太中大夫觀察使以上者官倍賜一應士庶男子婦人年九十以上者賜粟帛等令戶部具別則例行下所在州縣就賜務令得實不得擾呼百歲以上仍保明以聞一應禁軍指揮使以上各特與兒男下班祇應一名諸軍將校合加恩者並與加恩馬步諸軍將士等並特優賞仍比舊例以三分為率更增一分一應文武官因金人到離任者並限一月內經所在州縣自陳

並與免罪轉運提刑司勘驗給還任一應軍人丁夫等
逃亡及潰散官兵并州縣百姓因金人所至令失業之
人皆因有首領統率原其本心皆欲勤王止緣道路不
通遷延日久糧食不繼因而取給民戶劫掠逐路帥守
不曾差人總率見今嘯聚未散出首無路自新限一月
於所在首身其已前罪犯一切不問並放令逐便軍人
依舊本營原職名收管仍免所轄官司及本營問當其
少欠官私債負並除與放百姓願在軍者如少壯即減

三指刺填即便支給例物請受其徒中能諭衆歸業或
別首納限滿不首復罪如初一應今來嘯聚賊徒既許
自新如尚敢乘時作過殺害軍民仰安撫提刑司差那
兵馬捕捉并家屬務盡斬殺如數多本路軍馬不足申
樞密院差大兵前去勦除仰提刑司原立賞格召人擒捕仍許
徒中自相殺併依格推賞功效尤大者別具保明格外推恩後獲
不以今降赦恩原減一應逃避公人限一月出首依舊職名收管一
應逃亡軍人如能勸誘逃亡之人首身本轄官司直簿拘籍每五

十人轉一資副都頭以上每一百人轉一資及千人所屬具名申尚書省當議優與推恩一應戰鬪亡失官馬及散亡軍器什物之數合該科罪及官司見責令脩者仰統制官保明如委無欺隱特與放罪除免其民間有收到軍器等物許限一月經所在官司首依私有法其收藏官馬不納計贓科罪一應係官欠負不以名色百貫並行蠲免其曾經金人兵馬焚劫殘破州縣鄉村人戶日前私債雖無利息並限二年外方許理索一諸軍

昨緣勤王并因差出借過衣糧料錢並與除破更不尅
納一應宣和七年十二月二十四日登極合該轉一
官向有未經改轉之人並合吏部逐旋具鈔擬轉如
失去公案無可照據許取見任告勅照驗許本色官
一員委保特與轉補如未祇受歿於王事許回授於
本宗本色有官有服人一應緣金人經由州縣有燒
毀係官屋宇等守及差使被賊刼殺據者特與免本家
二年支移折變仍仰州縣倍加存恤一應諸路綱船靠

閣見欠或遭風水拋失若被盜勘會分明委無欺弊不得將官兵尅折請受特與除破一應諸路人戶見欠稅租并倚閣展稅賦及緣納錢物並與除放一應諸路借貸常平錢穀並特與除放一應諸路漕司多財用匱乏將民戶合納二稅宛轉折納或支移他郡却免未支移只納脚乘實惠之類致民間輸納增倍深屬拮尅今來並仰遵依條法不得妄冒支移折變仍許人戶越訴提刑司覺察當重寘典憲內京西路昨緣方田添起稅六

分外止送四分見錢更不支移折變訪聞轉運司將所
減分數數入舊稅抑令人戶輸納重困民力可恨敕書
到今與蠲免所有違法數入舊稅去處悉行改正仰提
刑司覺察仍許越訴一諸路稅賦支移折變自有成法
比年漕司以財用不足徃徃反覆細折如合納見錢令
輸紬絹却以紬絹之直折納絲綿之類惟務苛刻良民
受弊自今仰轉運司遵依條法不得依前違戾仍委提
刑司覺察聽人戶越訴一二稅折料合用納月時估中

價近歲轉運司與州縣務於搭尅將及納頓減時估不以豐凶低昂但稱引用養例折納大重人戶往往破產今後朝廷非軍事更不下轉運司非泛須索如折料尚敢循習不革守貳轉運司非泛須索并違制之罪加二等仰提刑司提舉司覺於起催月終以前具有無違戾保明聞奏不以實聞與同罪一預和買法本支實價訪聞官司立價甚低或高擡他物價准折或以無價虛券充數甚者直至受納未支本錢不遵條限前期起催急

於星火今來上供類欲依祖宗法其和預買有前項違戾守令并轉運司並以違制論加二等仍委提刑司覺察每歲於依限內一月內具有無違戾聞奏不以實聞與同罪一諸路諸般徭役非法令該載者罷該載而非急務仰監司守臣速具以聞當議一切蠲罷一應逃田見今地隣及地分掌管人等攤認租稅許令陳狀特與放免其田依條召人承佃候逃戶人歸業日給還一昨緣軍興官司於民間勸借財物及靖康元年後來人戶

於所屬州縣獻助錢物依靖康元年六月二日止指揮
給降空名告勅計價書填給還比緣監州州縣申明將
未降上件指揮已前獻助之物不理數今仰逐州長吏
限十日將已降空名告勅道計前後實納之數計價盡
數書填給還訖以聞如人數所納前數未及願帖納書
值者聽即不得抑勒如違許越訴當議重行黜責一應
今來因金人所至州縣劫掠逃避人戶仰監司守令多
方招誘歸業內闕食不能自存之人依災傷七分法賑

給與免今年夏稅雖歸業而無力耕種者仰提舉常平
司更切審量據等特行借貸錢收買牛具之類候將來
收成日分三年逐科帶納人戶置買耕牛權免錢糧一
年其緣金人兵馬蹂踐田土鄉村依此施行一昨經大
帥府駐劄及一月以上去處應辦軍馬極為勞費今來
夏稅並與放免省一應舉人特奏名并就殿試靖康元年得
解及州學職事人並免將來文來解一次一應天府差
人防秋至今春未能放散顯妨農務應緣來差科保甲

除逃亡人外特與免一科支移折變一諸路義倉在法
合同正稅為一鈔輸納訪聞提舉司以轉運司侵用有
令人戶不得隨稅帶納去處顯屬違法仰命遵依成法
改正施行一應人戶典賣田宅因官司不為減落第等
見依舊供應科配差使限赦書到一月許自陳驗實特
與減免一應今日以前典賣田宅馬牛之類違限印契
合納倍稅者限百日許陳特與蠲免事發在限內者亦
准此一應崇寧以來增置務其稅入課利除給官吏等

支費外所收錢物不許去處仰轉運司體度並行廢罷
一應崇寧以來因買樸坊場河渡及折欠官物沒納田
產未有承買者與減見買價三分聽欠戶與收贖限滿
不贖即依所減價出榜別名人承買仍作三年六料輸
納一訪聞自來赦書所放逋欠轉運司及州縣迫於調
度依舊催納至民間有黃紙放白紙催之語甚失朝廷
寬恤愛民之意今來大恩與常赦不同兼務節用可以
裕民如監司州縣輒敢故違巧作名目依舊科抑被科

人戶越訴其官吏當重行貶竄一應近年以來州縣緣應奉之費用度窮迫至有前期括借民間二稅免役坊場課利等錢顯是違法自今須管依條限催納不得預借一祖宗以來天下上供委有常數自熙寧後因臣僚奏請歲有增加不勝其弊仰諸路轉運司取索轄下應干見今上供物數開具祖宗舊制及熙寧以後增添數目間奏當議並行裁損以紓民力自崇寧以來州縣倉庫受納稅賦務加槩量以圖出剩東南六路為甚以故民

力困乏其弊本於補發綱運斛斗額外增數可除歲額
上供數外其每年任其起補發額斛並權住罷一諸路
常貢之內有時新菓外味之類所在因緣貢奉外取索
歸空庫更有饋送搔擾為甚仰體禮部勘會除緣天地
宗廟陵寢供獻所須外餘並罷貢一自崇寧以來州縣
因拋買上供綱運取辦民力或以和雇為名科差鄉夫
般擔挽運極為搔擾自今後並不得以和雇為名科借
鄉戶以代兵役州縣故違或監司強抑州縣應副者並

許人戶越訴當議重行竄黜一應監司州縣違法賦歛
涉於掊剋或科配大買物色實擾害及應干民間疾苦
事件並許中外臣庶詳具利害經所屬官司陳述繳奏
或詣闕投進當議考察改正施行雖語言詆訐亦不加
罪一應州縣官昨緣京城圍閉赴任愆期多致員缺應
已差下官除程限一月到任限滿不到令本路監司郡
守各選有才幹人權行具名奏差一次已奏差者他司
不許衝替及昨緣防秋所辟官屬先次赴任因郵置梗

滋未受付身人並以掌管職事日與理為到任月日一
應州郡金人曾到城下保守無虞者令所屬等開具元
守禦及出戰官兵等保明申尚書省取旨推恩內應天
應係祖宗開基之地有三聖御容兩院宗室控扼東南
為襟喉衝要之處與其餘州軍事體不同所有原守禦
戰官兵等特先次與轉一官資選人比類施行仍令元
帥及應付長官開具保申尚書省給降付身一應吏部
宗室注授恩例自有定法昨緣言論列遂同庶姓甚失

銓叙之意可依舊法一應宗室犯罪見鎖閉監管拘管人該遇今來恩宥並放逐使宗子婦人見入道為尼願還俗聽原有官封者依舊一應宗室昨來預貢及得解之人並與推恩一應宗室無官人依政和五年二月二十四日冊皇太子赦與量試推恩一應外官宗室未有差遣及已授三路差遣願別授者並令吏部不依名次先次注闕近便差遣一應諸宮院屋宇近因拆毀致使宗室至無處居止並許量口數多寡指占空閒官屋及

寺院居住一應宗室因金人取過軍前本房老幼無人養贍或因逃避散居州縣以至失所在京委開封府在外委守臣速行措置月給錢米無令失所不管漏落別聽候朝廷指揮一應宗室年幼未及官員并忠義之士在外非曾奉朝廷及大帥府指揮激於忠憤自募勤王人兵未有統屬今來國事稍定仰各將見管人兵交付所至州縣主兵官訖出公據量帶人從前來行在特與推恩一應官員因疾病陳乞致仕今已安痊不以年限滿許召保官員原委

保自陳特令再任一應命官尋醫侍養許並召保注一應
恩澤補受文學並許依法召保注權入官一應合特奏特
並與免試內曾經六舉以上到省人與登仕郎五舉補京
助教四舉上州文學兩舉諸州助教人願赴將來特奏名
殿試者亦聽雖在下等不應出官人亦取旨陞推恩一新
春合赴省試人昨緣道路艱阻復歸本貫及在京人即未
有取應之期令禮部檢會故例取旨施行一應去年錫慶
院試中武士未經推恩人仰本部限一月開具等第姓名

申尚書一應院官官有隔下撥放並許於所屬自陳保明
申禮部限三日給降其今歲聖壽節合撥放去處雖不
曾投進功德疏特與依例撥放試經者與額外添數一
次合就試一百人以添一名一百人以上者兩名三百
人以上三名一應暴露遺骸無人識認者許在寺院埋
瘞每及一百人令所屬勘驗申禮部給度牒一道一應
自今官員犯罪若依賊私自斷定更取特旨斷如係公
罪止令刑部大理寺斷定刑名施行更不取特旨一應

命官流配編管羈管人永不移放逐便除名追降官資
及勒停責授散官安置或官終身不齒放歸田里人等
及永不收叙人並與叙元官落職人欲復舊職折資及
降等差遣人與復本等差遣合檢舉者刑部限三日舉
其蔡京童貫王黼朱勔李邦彥孟昌齡梁師成禪積及
其子孫皆誤國害民之人永不收叙一應吳儲吳侔王
宋劉曷等親屬前來禁錮約束指揮條具以聞停降諸
色人等未經叙用及永不收叙人並特與叙原職名已

遷補者額外收補一應編管移鄉人并永不移放者並放逐便沙門島罪人不以年遠近並移鄉五百州軍一應命官公人軍人犯罪除名有特旨除名停僭羈管大理寺合斷刑名外一時特旨除名停僭羈配安置之類本不合坐罪者並與除落理元斷月日一應特旨還俗僧道自陳特與依舊為僧令本州出據公據一應禁軍犯踰濫情重條並行隔下不得遷補轉若經斷及五年不曾再犯候轉日委所屬勘會詣實特與轉行一應急

脚馬通鋪兵因金人所至逃避散在諸處送遞角可專
委本路提刑司疾速招刺依舊擺鋪仍依時支給請受
一應緣軍與收置物至未曾交還價錢者並限十日支
還一京城圍閉日久商旅不行今道路方通理當優異
其商賈欲船販物貨上京者並經州縣自陳出給公據
特與免沿路稅錢一應中外有文武畧藝出倫或淹布
或沉下僚內自禁從外至監司郡守廣行搜訪各舉
所知一名如舉得其人並行選擢限十日內薦舉仍與

以所舉人移文州縣以禮津遣赴行在一應孝順子孫
義夫節婦所宜旌表以厚人倫事顯著者仰長吏明白
來上一應祖宗以來赦內常稅寬恤事件及名山大川
歷代帝王祭祀封爵等檢會行於乎聖人何以加孝朕
每惟問寢之思天子必有所先朕欲救中原之急嗟我
文武之列若得忠義之家不食而哭秦廷士當永於報
國左袒而為劉氏人咸樂於愛君其一德而一心竚立
功而立德共復兩宮之復終圖萬世之安副我憂勤躋

時康又

三朝北盟會編卷一百一

欽定四庫全書

三朝北盟會編卷一百二

宋 徐夢莘 撰

炎興下帙

起建炎元年五月一日庚寅盡五日甲午

中興記曰初命滕康草赦文或詆斥圍城士大夫有憤
怒意上命耿延禧改定以進且云圍城士大夫一切不
問衆服上有大度真寬仁聖主矣 朱勝非南都翊戴

記曰上幸南京登極非建言受命中興宜築壇行禮北望二聖寅受寶冊乃即帝位因治壇於府東偏五月朔上登壇受寶改元建炎請以中興受命名壇載於登極典詔可之 遺史曰初上在相州也閏月十四日夜夢淵聖令盡解所服袍帶而以自所服者賜之望日上語延禧世則羣臣不敢對先是太上皇帝將禪位解所服排方玉帶賜淵聖既上出使河北淵聖又解以贐行上在河北懷衛諸州申狀皆為靖王或為康王或以紀年

之號兩當之至是始悟靖之為文立十二月也蓋淵聖
立十二月而上建大元帥府遂即帝位也 黃潛善中
書侍郎汪伯彥同知樞院事即日押付都堂治事 黃
潛善制曰中書政事之本一新萬化之原賢者邦家之
基茂建百王之典朕紹膺鴻緒綏御庶邦炎正中微國
步孔棘興衰撥亂坐收三傑之功舍爵策勲進陟五臣
之位具官某器識沉毅而足以任天下之重學問淵博
而足以識古今之全蚤服采於禁塗寢宣勞於外屏邊

烽侵犯都邑震驚纏氛侵於九重接蕃戎於萬里立轅
門而左祖倡義旅以南征間閔百難獨見松柏後凋之
操險夷一致遂成桑榆不負之勲是用蔽於僉言擢升
右省式慰沃心之望聿新大政之元爾惟丕命其承廸
以先王之典予其克邁乃訓永奠烝民之生益懋遠猷
以對休命 汪伯彥制曰朕惟列聖儲休千齡累洽軍
政隳壞將帥情驕強敵長驅京邑震擾博延羣臣之議
人莫與能檄名天下之兵士無闕志卒罹變故幾至阽

危肆疇佐命之功共濟經邦之業具官某學貫千載知
出萬夫沉謀有先物之幾居簡得鎮時之望參華延閣
出統藩符屬時訪落之謀實預扶衰之義肇開幕府爰
整師于豐邑故人莫重蕭曹之冠雲臺諸將獨高冠鄧
之勲是用順考僉言蔽自朕志擢司兵柄進貳機庭幹
茲心膺之憂實賴股肱之舊勝殘去殺期臻奠枕之安
保大定功共享銷兵之福往承茂渥永底丕平 遺史
曰中興之初黃潛善汪伯彥首為執政智者必知二人

金史卷一百二
無進攻之志矣

二日辛卯上靖康皇帝徽號為孝慈淵聖皇帝內劄勅內外文武臣僚等朕比以乘輿播越宗廟阼危迫於師言勉紹大業居軫晨昏之變載深手足之懷恭惟靖康皇帝聰明憲天節儉由性子育加於庶彙色養逮於兩宮金人內侵四郊多壘乃遣單車之使欲邀龍德之歡代親而行即日命駕繼以編戶困於金繒復再屈於敵營欲為民而請命沉幾淵識外晦內明時方艱虞聖以遵養

溥率萬邦之望，俟瞻八駿之歸，雖道妙無名，豈形容之可及。惟德施罔極，顧遵奉之敢忘。爰舉徽稱，用昭盛烈。靖康皇帝宜上尊號曰孝慈淵聖皇帝。乃令所司擇日奉上册寶，應合行典禮。禮官即速討論以聞。遺史曰：初淵聖即位，以四月十三日誕辰，為萬壽節，大酺天下。臣民詔到四方州郡，有挾符讖之說，妄以私意猜度，指為不吉，追金師深入淵聖播遷，若為先兆焉。元祐皇后為元祐太后，御劄勅內外文武臣僚等，朕惟德盛。

者報必隆屬尊者禮宜脩古之彛訓國有故常元祐皇后制行徽柔宅心虛靜蚤儷極於永泰久慕道於瑤華庚辰並后之文已嘗誕告丙午復號之旨未及布宣比者敵騎內侵都城失守方二聖之遷播屬百辟之抗言還御宮闈暫臨庶務洞達機事之變深惟宗社之安踵遣使輶敦諭至意建此續圖之日亟頒國政之書叙惟其功舉協於義是用參稽衆志奉上尊稱與茂對於休辰以永綏於壽祉元祐皇后冊為元祐太后仍令所司擇日

奉上冊寶應合典禮禮官疾速討論以聞元帥府限十日給局 詔責李邦彥等詔曰作事貴於謀始自古不能去信苟乖此道亂所由興李邦彥等皆靖康主和議之臣或料敵失宜自成懦弱之勢或過聽誤事復忘脩禦之方用起兵端以誤國計孝慈淵聖皇帝勤政宵旰庶圖治安謀臣既未能慎初武服固難於善後興言及此罰其可逃其李邦彥等吳敏蔡懋李稅宇文虛中鄭望之李鄴已下三省別行竄責播告中外咸使聞知

詔修國史詔曰朕遭家禍二聖播遷單孑一身義不得死三事大夫羣黎百姓戴宋惟舊用歸屬於眇躬朕欲身先士卒北首赴難咸曰宗廟之重不可一日乏祀且將攝行國政竢時復辟則又曰天下之大不可三月無君遜避無從百辟復至蓋祖宗德澤在人固若膠漆天其或者崇降咎災以警懼我宋是用思憲祖宗之舊仰承天意庶或悔過以輯寧我家賚及赤子嗚呼惟孝弟可以動天惟憂勤可以成務惟恭儉可以富民惟兢業

可以保國惟大公可以悅人惟至仁可以安衆惟來讜
論屏側言可以達聰惟近正人遠寵偉可以成德惟守
大信可以規遠圖惟有常德可以立武事不弛不擾始
終如一夙夜惕勵式禳不祥庶幾降鑒俾復父母兄弟
宗族朕將視舊章不以手筆廢朝不以內侍典兵權容
受直言雖有失當不加以罪謹聽斷除苛撓抑未作去
浮靡斥聲樂之奉絕游獵之荒非奉典禮尚方無飾綉
繪非急繕治大匠無營土木非軍功無異賞非戎脩無

僇工弗利於衆非衣服飲食皆可廢有宜於國雖赴湯蹈火皆可為斷之必行無或有二尚慮諸臣徂於故習有以祥瑞奏聞褒頌功德浸於道諛諱隱過尤務在蒙蔽大臣蔽賢有舉非實臺諫懷慝有言非公凡此之屬必殺毋赦朕臨御之始德意未孚於上下用仲播告以敷朕心茲言不食咸聽毋忽 大元帥府一應行將佐官吏卒伍自河北京東扈衛有勞較優劣等第來上當與推賞 諸路勤王之兵皆至行在諸路勤王兵至行

在於是王德初撥隸劉光世為右軍將官 郭京走至
襄陽統制官張思政會兵擒而殺之初郭京至自京城
奔走沿路稱撒豆為兵撒草為馬假幻惑衆取兵二月
至襄陽有三千餘下寨於海子頭京居於洞山寺欲冊
立宗室為帝置使錢蓋西京總管王襄及統制張思政
等止之不從會有自京城逃遁來者具說京以妖術誤
國京城不守思政乘間會諸頭兵襲京囚之至是欲以
京赴行在半途為李孝忠所襲思政就輜以槍刺殺之

三日壬辰以張邦昌為太傅同安郡王五日一赴都堂
叅議事汪伯彥建炎時政記曰是日早朝上謂黃潛善
汪伯彥曰何以處邦昌潛善曰邦昌僭稱名號罪在不
貸為金人所逼脅念其不得已而從權金人既退專遣
謹肅奏書繼遣謝克家歸寶璽又迎請隆祐太后歸於
宮闈退居東府駿奔來朝惟陛下睿斷處分如何上曰
朕嘗與邦昌同奉使軍前小心畏慎不幸逢此禍變雖
不能死以盡節然遭變行權緣此宗廟不隳社稷不壞

一城生靈獲全肝腦金人繞退齋書赴朔歸寶來朝朕
既貸其初欲馭以王爵異時金人有詞使邦昌以寶具
書報之曰舉國之人不忘趙氏彼師不旋踵而天下勤
王之兵皆左袒歸宋故邦昌恐懼不待問罪辜保首領
而反籍於朕使金人知天人之歸出于自然卿等以謂
如何潛善伯彥同對臣等謹奉以施行故有是命 命
黃潛善等募忠信能專對之士奉使金國除作國書外
命張邦昌更作金人書草遣使人以行 宗澤徽猷閣

待制知襄陽府耿延禧董耘高世則宮觀兼侍讀黃潛
善戶部侍郎梁陽祖徽猷閣待制淮南江浙荆湖制置
發運使兼提領措置茶鹽楊淵王起之秦百祥並除郎
官趙子崧延康殿學士知鎮江府

五日甲午耿南仲請老除觀文殿學士提舉杭州洞霄
宮遺史曰先是上在濟州羣臣勸進議已定耿南仲奏
臣老拙幸得遭遇竭盡愚直唯靖康行遣蔡京廷臣多
翼蔽之終雖貶出然蔡氏所引實繁有徒必不利臣父

子乞賜全保上曰國家今日之事吾最痛心其次門下侍郎父子耳使天下無事吾得居藩衍宅事父兄門下侍郎安享爵祿豈不為美今日不得已吾即繼大位豈不能保全一舊師傅乎師傅吾師傅也且老矣月以數百千養一前朝老師傅直易耳人言毀譽何足信至是南仲告老乃除觀文殿學士提舉杭州洞霄宮奉聖旨耿南仲為孝慈淵聖皇帝勸講官十有五年同朕在外歷艱難險阻又踰半載今以年老乞罷機政所請見今

恩數人從可特令依舊餘人不得援例 分劉浩丁順
孔彥威王善等軍上命劉浩丁順孔彥威王善各以所
部人分為三等軍人為一等百姓強壯無業可歸願充
刺軍者為一等老小怯弱不堪出戰人為一等仰各具
見在人數將上二等撥入五軍收管三等給公據放令
逐人歸業除劉浩遙郡防禦使大名府鈐轄丁順遙郡
防禦使滄州鈐轄王善人數少與轉秉義郎差濮州雷
澤縣尉所有逐項下使臣人兵功賞仰各具保明狀申

奏等第速與推恩傳亮勤王人兵依劉浩等例分為三等亮除直祕閣通判滑州趙子崧荐對改通判濟南府上韋賢妃尊號為宣和皇后御劄敕内外文武臣僚等報德莫尚乎隆名謹化必先乎廣孝茲古今之通誼乃邦國之彛章韋賢妃聰明忠和淑柔淵懿育於慶閨嬪我親闈象服是宜淑則脩於四教彤管有煒徽音冠於六宮誕毓眇身嗣紹大統念慈顏之在遠尚阻奉於晨昏顧領典之有稽宜並崇於位號是用叅稽衆志爰

舉不稱肆張母道之尊歸安天下之養宜上尊號宣和
皇后 夫人邢氏為皇后制曰乾坤定位而萬物育日
月遞照而四時行序人物之大端慶必衍於婦順得天
下之內助治莫尚乎家齊朕嗣守慶基肇臨寰宇茂建
長秋之號爰稽前代之文誕告外朝式孚羣聽嘉國夫人
邢氏洵美且異淑慎無違系出華宗夙啟射屏之慶質
全碩媛載著倪天之歌居自勅以箴圖動常資於保傅
來嬪朱邸增輝皇家屬蘭馭之在行顧椒塗之虛次載

念續圖之始有懷內助之賢翟弗以朝竚來歸於京邑
佩玉之儼將表正於宮庭登進名位之崇昭示風化之
首於乎塗山翊夏克相神禹之功華國興周久資太姒
之德庶並受福祿以永格和平尚慎乃躬期協朕志可
立為皇后 宣和皇后邢皇后在園城中皆遭金人遣
請隨二帝北狩遙冊立也 詔李綱赴行在勅李綱卿
被遇兩朝廷登四輔出專將鉞宣威久去於周行總治
王畿中命已頒於名節屬朕續承之始遭時變故之餘

經體贊元必賴股肱之舊弼折衝厭難兼資廊廟之訏謨蔽自予衷誕敷廷號俾發揚於賢業以寅亮於天功式遄其歸虛心以待已除卿尚書右僕射兼中書侍郎詔書到日卿可疾速發來赴闕先是靖康圍城中以資政殿大學士大中大夫領開封府事召李綱率湖南義兵倍道前進至江寧府遇周德作亂使人招安撫定以周德赴勤王為名支散犒設悉委會羣賊於轉運司既而次第執去斬之周德聶旺皆凌遲處斬江寧府乃

定時已聞京師失守欲赴大元帥府行次準備聞二帝
北狩知上即位於南京先遣人馳行在上疏論議和之
非

三朝北盟會編卷一百二

欽定四庫全書

三朝北盟會編卷一百三

宋 徐夢莘 撰

炎興下帙

起建炎元年五月五日甲午盡十四日癸卯

五月甲午內除麻制資政大學士大中大夫領開封府
李綱除正議大夫尚書右僕射中書侍郎制曰門下
稽古建官莫先於論相用人惟已尤貴於得賢將宏濟

於多艱益眷圖於舊德巨川之待舟楫茲惟暨於同心
元首之賴服肱蓋相湏而成體帝賚良弼國有賢臣肆
延登於宰司用敷告於列位資政殿大學士大中大夫
領開封職司隴西縣開國伯食邑八百戶實食封一百
戶李綱器宏而道遠學高而德方才兼文武之全識洞
聖賢之蘊蚤紆宸睠寢踐華塗歷事上皇獻言有同於
藥石被遇淵聖告猷不貳於幾衡神明扶其精神天下
想其風采頃暫釋於樞筦弛總尹於上京久留遐方殊

拂輿望顧予眇質獲纂丕圖整王綱於既壞之餘張國
勢於中微之際宜得碩輔共濟遠圖是用擢居右揆之
崇兼侍西臺之峻迺錫侯爵進陟文階御以爰田陪之
圭賦併昭異數式勸具僚於乎周室中興山甫明庶邦
之若否唐朝再造子儀任一代之安危朕欲經營四方
汝為朕欲訓飭百工汝率惟長策遠筭可以弭難惟竭
誠愛日可以圖功其尚弼予一人亦有辭於永世可特
授正義大夫尚書右僕射中書侍郎進封隴西郡開國

侯加食邑七百戶食實封三百戶主者施行 朱勝非
除中書舍人胡戴記曰靖康元年冬金人再攻京師勝
非為右司員外郎被命使軍來往計事及張邦昌倡和
議質金營乃請勝非行勝非中道上疏論邦昌懷奸不
忠必致誤國和議不可恃劫質不可信請大為將來戰
守之防又沿路得邦昌榜檄語涉怨望且挾敵勢逼脅
郡縣須索無厭委以上聞臨出彊得旨名還時朝廷議
建四道都副總管八帥分制諸路以衛王室除東道副

都總管倍道之南都才到三日都總管胡直孺提兵勤
王竭本道錢穀甲兵以自隨所餘羸卒僅三百人而食
才支旬日強豪富室先已逃避既而金破直孺之師於
襄邑執直孺以寇應天敵攻南門矢石如雨以大車載
芻藁縱火逼城圍敵將躍馬來望指呼其間公命伏弩
於要地伺之遂為効用邵曇者射中敵將目墜馬而死
敵勢遂卻經月不近南門乃增陴浚湟益修守脩躬櫬
甲冑與士卒同飲食夜宿城樓者凡數月徒步巡督率

一周匝雖雨雪泥淖未嘗肩輿敵柵城西北隅攻圍計百出度宜應之敵不敢攻邦昌既僭竊遍為書抵諸路帥守一日敵騎送其使至城下集官吏發緘訖械其使乃繳書元帥府敵既不能犯南京遂安大元帥進兵濟州既日趨謁諸臣僚未有至者乃首建大議曰今二聖北狩天之心屬在殿下宜以時正位號係天下望且曰南都藝祖皇帝興王之地宗社神靈使敵不能陷以為大王受命之基請亟幸之以圖大計遂幸南京登極

上即位之五日故有是命 楊惟忠加殿前都指揮使
建武軍節度使楊惟忠西番部落也從童貫有功靖康
中為高陽關路兵馬副管 元帥府在東平也惟忠來
以為都統制及黃潛善張換高公翰卒彥宗王激皆領
兵今惟忠總之上即位加殿前都指揮使建武軍節度
使

六月乙未詣鴻慶宮恭謝 馬忠除龍神衛四廂都指
揮使河北統制張換加通侍大夫忻州觀察使河北制

置使皆以兵出河北制曰朕惟兩河之民更百戰之役
田野三時之務所至一空祖宗十世之遺厥存亡幾
肆風宵之軫念如水淵之交懷孰知拊循經遠之謀我
有梟俊折衝之士馬忠幾能先物勇不顧身宵出名家得
山西氣俗之厚任使邊塞知漠北封圻之詳昨逢多壘
之艱屢立干城之績雖曾進秩未殫所長爰升統制之
崇加俾使權之重料百城之丁壯總以五符提兩路之
精彊蒐其軍實兼收羣力克展壯猷上以迎二聖之還

下以正四封之守任吾之責時乃之休 命馬忠將所部人兵五千人號一萬人前去河北恩冀州以北取路過河趨河間府雄州以來追襲金人又命張換將所部人兵五千人號一萬人前去與馬忠接濟相為聲援七日丙申薛廣張瓊以兵出河北 命薛廣將所部人兵三千人號六千人前去自內黃縣過河會命河北山寨義兵一萬人收復磁相等州又命張瓊將所部人兵三千人號六千人前去自開德府西渡會合山寨義兵

一萬人與廣接濟相為聲援 劄下陝西諸路帥臣招
集人馬聚積糧斛以待朝廷遣使前去措置恢復又劄
西京翟興團結本處義兵保護陵寢

八日丁酉呂好問除尚書右丞制曰富貴不足解憂方
極慕親之念孝悌施於有政莫先同德之求朕以眇躬
嗣承大統遭家不造凜若淵冰雖三軍舉同左袒之心
而二聖未返北轅之役棠棣之華韓韓敢忘原隰之求
大隧之樂融融有待封人之荐具官某儒術之茂閭然

實章信厚之資老而彌篤徧陪甘泉法從之列實自靖
康搃攬之初從容片言綽有回天之力險夷一致益堅
衛上之忠肆圖邦命之新進搃文昌之轄倚老成於典
刑之重登世臣於故國之遺朕之股肱誼同休戚其念
兩宮戴天之義體予一人側席之思倘能遣侯公而說
之必有御趙王而歸者亶惟乃辟是佑則於永世有辭
秦湛回天錄曰宣和七年金人違盟約結連契丹燕
人入塞朝廷方講和好不以為虞事至非意故南至京

師种師道宿將諳練兵事而大畏懼不能聽從既而用兵失策繼失太原時兵部尚書呂好問以諫官趨召呂公上言十三年造作此禍今患難已至此金在諸路帥臣協力共濟豈可猶用前日恩倖及貴近親舊尚因貨賂任使之人欲乞選擇改易又諸路諸州湏令各為之所兵食可以自立萬一秋冬之間金人再動不致悞事及召回劉韜等并河北民兵自真定至邢相傍太行山置大寨以脩衝突及應援沿邊諸州今冬金人再至指

揮盡於四路諸所起勤王兵又乞於諸路已起人內選
擇堪用之人就糧於尉氏咸平陳留東明四處若敵騎
越河則以四邑之兵列寨如連珠或五十里或三十里
則置一寨以護都城使敵衆不能遽犯亦通四方音信
又言防河須用宿將若外戚宰相親舊及省院使人之
屬皆不可用又言防河之兵暴露日久慮其困乏不能
對敵今沿河皆設堡障又言太行山在懷澤之間最爲
要害乞別委宿將專守險隘雖大軍進退自不相干宰

執堅不從至是言今名諸處兵已不及在京見有二十餘萬乞十六萬人於城外立寨以護城壁宰相亦不從金人兵至都城之外蠟詔康王為兵馬大元帥金人攻城甚急鼓噪之聲震動端門之前都城失守御筆夜召公許戎服冒雪而騎兩快行親從介而持刀以先邁上欲幸襄鄧羣臣多藏匿獨呂公與宰相何鼎及同知樞密院孫公傳入侍既而不果行上幸敵營曉命呂公入城撫慰軍民上既至敵營金人請遣使止諸路勤王兵

呂公見宰執曰京城圍閉之久諸處都無入援之人若更遣使降詔止絕則悞國益甚宰執曰二帥堅要如此呂公曰可緩其辭則忠義之人自曉矣所遣使人須當慎擇庶不敗國家大事宰執曰公何等語耶呂公曰某所見如此不敢不盡深恐後悔耳宰執曰自家在它重圍中如何却得聞氣呂公曰四方若有忠義之人統兵雲集竊恐金人亦有顧忌上再幸敵營命呂公等入城撫諭翰林承旨吳玠入內都知李石賁尼堪幹里雅布廢

趙氏立異姓文字來及請太上皇帝親王等於是執政
官及內侍從官集內東門皆號哭呂公曰自敵圍京城
張叔夜來援其後數日天下帥守無一人至我孤彼強
致有此禍計無所出但當率衆懇告耳若其不從上皇
出城亦未遲也李石出上手札呂公曰此乃不得已而
書也夜半不能決呂公曰諸公不取某言何也遂拂袖
出女真令吳玠莫儔促立異姓繼聞皇城司集議立張
邦昌呂公於是密使迪功郎蔡安中門下省錄事張師

聰訪康王大元帥府親戚得韋淵蔣時師愈魏養并潘
夫人給使孫卞郭貴等求大元帥所在及作蠟書脩陳
內外之事呂公凡謀事並夜間中庭不聞人聲處方敢
說話及寫文書等與人謀議並使其子夜間雪中布衣
芒屨傳達意旨及定議呂公亦伺雪夜間自往及見外
戚婦女等要約其實止一親吏隨行雖門前使令皆不
知也呂公與監察御史吳綸馬伸張所文林郎吳結閤
門宣贊舍人吳革日夜密謀迎立興復有勸呂公託疾

呂公云今日實是某盡節之時將來事了閒退譬如人家遭火須看烟塵去救若遠坐看着焚燒都不管或有人救滅便來爭功燒盡時一齊散去則何用世臣也上請者或於尚書省中謂上為廢帝公怒形於色曰聖人全德天下歸往何嘗廢乎其人曰盍稱靖康皇帝乎公曰亦非也君父位號豈可擅改一坐聳服公密令做造祖宗神主易廟中所列而藏之以虞敵取公以已俸錢一月建靖康聖節道場於景德寺寶勝永慶院時公權

領門下省但書尚書銜仍舊諸公謂之公曰受命於上
不可易也有請改年號者公立爭之有移文必去年號
公不能止但自行文字必稱靖康二年邦昌欲出別二
帥公曰萬一二帥要留人防衛相公何以處之邦昌答
云無此公曰不可不預為之備今若留人在城裏令居
民不聊生若在城外四方道路斷絕設若使他恣縱相
公敢治他否邦昌曰此說是也尼堪果存留鐵騎五千
邦昌力辭次日又使高慶裔王芮來說留人防衛等事

公曰南北异道恐北人不諳水土或不能依南朝法則却致驚擾慶裔曰留一貝勒在此處置可也公曰貝勒貴人豈敢煩他況南地夏熱或有疾病則南朝負罪深也慶裔曰甚好况只在河北急要南人飛一騎來說即時遣去應副是日金人軍行公曰過一日已晚脫城外推尊策立則奈何邦昌曰彭寵之事安保其無苟或所謂愛人以德也或謂公曰若金人回戈公豈能遏他不若且更待一年半歲則上下穩便公曰金人糾合諸蕃

皆厚獲金玉女子而去必無回戈之理若有回戈之事
某固不可過但道理如此倘罹於禍則是死宗廟社稷
也處死有名萬一京城軍有變吾輩為他戕殺死則得
不好雖懷忠義之心何處告愬四月八日公之子自陳
州至濟州行在謁大元帥大元帥曰尊公先有帛書來令
左右閤子中書袋內取出以示公之子故其後特降親
禮稱呂某昨邦昌僭號之初即募人贖帛書具道京城
內外之事金人甫退又遣人勸進臣僚所不知付尚書

省行下照會至南京故有是命 黃潛善兼御營使汪伯彥御營副使范訥京城留守郡漣京城副留守放散諸路兵多有散而為盜賊者

十日己亥路允迪為京城撫諭使耿延禧為京諭副使上曰京城士庶自金人退師人情未安差官撫諭黃潛善對欲差路允迪耿延禧上之信臣可遣至京師故有是命 大元帥府局幕府官僚五軍將佐應扈衛過河至應天府軍兵並與等第推恩批荅許份乞幸揚州狀

奉勅許份申仍與衆熟議皆以為揚州之地控帶江淮
城壁新修乞決定至計即日御衆治兵廣陵事具悉海
淮故區下控南服統臨一道實自本朝卿以待從之近
臣膺藩宣之重寄志在王室深惟國步之難利究公家
繼上時巡之請屬方勤於北顧難遽議於東遷言念忠
誠不忘嘉嘆所請宜不允故詔示想宜知悉 先是知
揚州許份於四月末間有狀申大元帥府乞駐師揚州
狀曰恭惟國家祖宗功德澤被天下上皇臨御二十六

年遜位嗣主繼膺丕業克勤克儉至德罔愆伏自即位以來未嘗暇逸再歲金人深入一旦事出非常二聖播遷萬方憤懣凡在臣子如失父母痛心疾首無地措手重托大王獨留於外天意人事理實有歸份等謂神器難以久曠輿論豈宜屢抑伏望大王決定至計早登天位以副二聖顧託之意安億兆顧戴之心且以京師新破北顧可慮渾鄆二郡與敵為鄰南京雖號興王之邦而金騎屢至亦非息師之所唯揚州號古都會前江後

淮險固可恃四方水陸此得其中加之合郡僚吏下至
閭里細民延望維日為歲份等誠願大王俯就人欲駐
蹕於茲誕頒詔條綏靖寰宇又况地距河朔不甚為遠
可以時遣候問二聖興居治兵養士圖迎鑾駕若乃繕
治宮室百司與夫儲蓄軍民糧餉之事份等悉力可以
畢集份等恨以職守不獲躬詣王庭但仰瞻激切拳拳
之至 金人攻瀛州

十四日癸卯詔罷天申節上壽朕承祖宗遺澤獲居士

民之上求所以扶持危顛未知攸濟念二聖之鑾輿在
遠萬民失業將士暴露百官有司靡所底寧夙夜痛悼
幾廢寢食倘可以復二聖而保生靈朕不愛身敢自豐
殖重國禍況以眇躬之故聞樂飲酒以自樂為乎非惟
深拂朕志實增感於朕心所有將來天申節百官上壽
常禮可罷當體朕意毋復有請 姚平仲名赴行在制
曰漢室脩邊復魏尚雲中之守秦人禦晉赦孟明殺澠
之奔與其選衆而收新進之材孰若弃瑕而責老成之

效具官某稟資沉鷙事上朴忠昨緣外侮之侵嘗畀中
權之任乃事戎昭之果靡遵廟勝之謀坐此逾年隱於
亡命肆朕纂圖之始時求敵愾之良議者皆言汝為可
用執干戈以衛社稷方急壯猷聽鼓輦而思將臣宜頒
異數爰復州團之秩俾趨嶽狩之朝庶分北顧之憂尚
掇東隅之失勉圖而績以副朕懷可復吉州團練使所
在出榜召赴行在

三朝北盟會編卷一百三

欽定四庫全書

三朝北盟會編卷一百四

宋 徐夢莘 撰

建興下帙

起建炎元年五月十六日乙巳盡六月二日庚申
十六日乙巳京東轉運判官閻丘陞責授濮州團練副
使封州安置詔士大夫所嚴者名分朝廷所恃者紀綱
倘於擾攘未定之間即為專輒自便之計國於何有意

則可知爾初無他長專喜自用比以人材之乏畀之一路之權所興興師以時赴援而躊躇四顧偃蹇不前逮吾幕府之開首戾轅門之令福威在已行止肆情凡今臺劾之所陳皆昔道塗之親見其錫爵投畀要荒尚堅循省之心無負生全之賜 顯謨閣直學士知東平府盧益落職宮觀朕惟國家有天下幾二百年所恃以安存者繁中外士大夫相與維持之力一旦事出倉卒社稷隳危而四方藩臣赴援者無幾朕甚傷之具官某初

無他長早服顯仕光被累朝之眷進登常伯之知在人
臣有見危致命之忠在方面有振旅勤王之義而丁寧
靡顧酣飲自如逮予踐阼之初巧作謀身之計近臣如
此謂疏遠何其鏘延閣之資往食真祠之祿茲為寬典
無復重愆金人陷河中府知軍府事郝仲連被殺

十七日丙午天章閣待制知同州唐重上書臣於今月
十七日恭捧初一日皇帝登寶位赦書望闕宣讀人人
感慨流涕當國步多艱之際忽聞詔音以定神器宗廟

社稷不缺祭祀四海生靈不忘舊德誠千萬世之幸累
日祇誦細繹詞旨其中有云紹祖宗垂創之基懷父兄
播遷之難卒章伺候兩宮之復終圖萬世之安其言哀
痛深切泣血銘心推原德意而施之惟恐奉詔不勤不
敏以辜新政廢神霄朝拜罷常平給散限外印契額外
撥折道僧還俗者給據商賈興販者免稅如此等事於朝
政非大安危也於國體非大利害也於人情非大休戚
也陛下制詔之意欲紹祖宗垂創之基必思所以興復

之策既懷父兄播遷之難必思所以救難之方此乃大
安危也大利害也大休戚也誠天下人大計也然祖宗
創垂之基以京師為根本以兩河為股肱金人再至京
闕則根本搖長驅兩河則股肱病矣所以為興復之策
者何如也陛下以太上皇為父以嗣君皇帝為兄金人
一舉而邀兩宮當披髮纓冠而往救之矣為救難之方
者何如也自古外敵之侵中國未有如此之酷然其吞
噬之欲尚未厭也其憑陵之勢尚未已也前日致兵之

因陛下嘗通知之乎今日禦兵之術陛下亦熟計之乎
既不知已而又不知彼者必殆既不能強而又不能弱
者必危陛下度彼已之實則知所以自治矣察強弱之
理則得所以常勝矣此天下之大計也陛下所以興大
計天下者固以素定非臣所得而擬議也然以今日之
務有四而其利甚博大患有五而其禍不可勝言臣為
陛下舉其畧而試陳之定都關中據山河百二之勢以
植根本之地所以杜瓜分之漸也建牧大藩重宗子維

城之計以固磐石之基所以救瓦解之失也通夏國之
好而守撫舊疆所以講好息民也立青唐之後而封以
故地所以興滅繼絕也此四者千萬世之大利也雖千
萬言而莫究豈非今日之急務乎若夫大患有五而救
患亦不可緩法令滋彰而吏緣為奸欲救此者莫先於
守祖宗成憲朝綱委靡而不振故士大夫相習而誕謾
欲救此者莫先於登用忠貞軍政敗壞而不舉故將兵
相扇而奔潰欲救此者莫大於正刑賞國用竭而利源

又失欲救此者莫先於選將漕之臣民心離矣而調發
方興欲救此者莫先於擇循良之吏此五者非天下之
通患乎今日之務有四而其利甚博大患有五而其禍
不可勝言皆詔旨之所及臣愚不忍緘默以苟容敢竭
愚而妄有陳焉天下之人計議不旋踵而投機之會間
不容髮陛下獨斷而早圖之以起中興之運而成再造
之功則祖宗創垂之基於此可紹而兩宮播遷之難於
此可復矣此誠天下之大計也臣曩叨諫省屢陳致敵

之因坐是斥逐承乏守土累上禦隣之畧言皆有証項
者聞陛下以大元帥之節戡定國難臣嘗具劄子陳述
三策乞移關中以符衆望臣區區之愚已陳其梗槩矣
茲者恭承詔旨許臣庶詳具利害陳述語言詆訐亦不
加罪以此見陛下誠有聽言之意首開求言之路有君
如此其忍負之臣慙愚狗國不識忌諱輒敢肆危言以
塞明詔進退存亡之幾臣於此卜焉陛下不以臣愚不
肖許赴行在得方寸地以披露肝胆庶幾或補於經綸

之萬一臣之願也臣非為自謀也實為天下國家計也
惟陛下裁幸

二十一日庚戌資政殿學士王襄趙野並落職責授太
中大夫秘書少監分司居住臣僚上言一旦金人再入
唯叔夜自南陽引兵直趨京城精忠挺然胡直孺身冒
矢石竭力前進雖敗被執其志可憫惟王襄趙野顧望
徘徊迂路頓兵曠日持久無赴難之意襄總西道反自
洛陽引兵赴鄧州却行南道野總北道反自大名引兵

趙廣濟單州南京却行東道又襄起兵之日金人已逼洛陽既不能直趙京城以救君父之急又不肯駐軍洛陽以庇一方之民其領兵而南也洛陽已陷又鄧州遂巡遇敗復回其潰散被害甚廣及聞陛下嗣有神噐即收拾瘦羸旋為迎鑾之計至於趙野其罪尤著所至從兵大掠至廣濟軍悉為兵擁進及單州皆被殘破又至南京每日遣兵卒討劫民財風聲四出滄濟州野皆所未到百姓夙夜惴慄惟恐野軍之來凡野所過民居唯

存墻壁而已百姓怨恨皆於壁上題云趙相公殘破去處在在遍滿夫設總管本以禦盜而野居其位反以為盜此宜不赦以懲戒來者奉聖旨王褒趙野並責授大中大夫秘書少監襄分公司北京襄陽府居住野分公司西京清州居住制曰忘身殉國者臣子之忠賞勉罰偷者朝廷之柄矧在艱難之際尤先總覈之公具官某早被眷知與聞機政昨屬都畿之擾大分方面之權俾各自專靡從中制復列諸屯之卒乘將為內屏於京師庶值風塵即

趨郊甸豈有兩君之在野畧無一騎之入關故取迂途
以為遁計既無以上紓國難復不能留庇居民公縱偏
裨肆為敵害逮朕纂承之始務昭含貸之仁如汝等倫
置而不問然人言荐至分綸靡容其分務於別都用少
伸於邦憲以懲不恪以警無良尚深循省之思無重悔
尤之積 李孝忠陷襄陽府安撫使黃叔教弃城走落
職降兩官與監當差遣李孝忠者京師百司健兒也都
城陷李孝忠隨衆奔竄出萬勝門得脫走京西沿路聚

衆有義兄弟十人而姓李者皆立名連孝字孝忠為首
又有孝義孝成孝信凡八人第九人乃張世也以衆寇
襄陽府京西安撫使黃叔教棄城走孝忠自南門入城
肆焚劫擄子女驅擁強壯為軍遂據其城而不去議者
請論叔教弃城之罪故有是命朕惟國家分方面之權
於平日臨師臣之選付千里兵民之寄嚴列城節制之
威亦惟事出於非常則當効死而不去矧襄陽都會之
域實漢晉用兵之郊方敵憑陵恃惟屏蔽豈有潢池之

內侮遽捐城守以出奔生使旄倪皆為魚肉迹其致禍
安所逃誅念更肇造之恩姑置惟輕之典削奪名寵斥
之冗官往思民冤痛自懲艾 翁彥國以賦歛被罪翁
彥國暴賦橫歛東南其黨吳昉為腹心助虐得轉運判
官物論沸騰而莫敢言其惡人無聊生至有擊登聞鼓以
訴者上始知而亟罷二人且降詔引咎以慰其民宰相
李綱以姻黨昵彥國庇之至貼改詔書獨罪昉而不及
彥國中書舍人朱勝非言舍渠魁而責支黨臣愚所未

諭也於是卒正彥國罪 孫傳張叔夜遙授觀文殿大學士 李若水賜贈觀文殿學士勅故吏部侍郎李若水立身殉國知死不懼忠義之命無與比倫達乎朕聞為之流涕可特贈觀文殿學士與子恩澤五人賜銀絹五百疋兩 耿南仲落觀文殿學士提舉杭州洞霄宮制曰兵家之策所貴伐謀廟廊之臣豈容誤國儻或信常談於紙上不知墮敵國之計中苟偷歲月之安馴致國家之禍人言荐至邦法可逃具官耿南仲頃委政機

適當邊警朝廷可否唯予舊學之謀天下安危恃爾老
成之重謂當決淝水之戰乃專主平涼之盟坐使中原
幾同外壤朕痛夫二聖之狩考昔者羣臣之言誰致亂
階汝為戎首姑鋸秘殿之秩以正具臣之誅尚省厥躬
毋忘予戒臣僚言南仲專講和之罪故有是命

二十五日甲寅邵溥落職京都小郡制曰臣子事君當
守險夷之一節國家多難豈容顧避之兩端具官某服
在近途久更器使昨抗章而請覲既優詔以俯從聞有

出疆之行乃為擇地之計懷讓如此為爾悵然其亟解
於近班用黜臨於小郡茲為寬宥毋廢省循

二十八日丁巳遣使撫諭諸路 上謂黃潛善汪伯彥
曰金人肆伐中國生靈塗炭朕不得已而徇天下之情
二聖北去繼序雪耻思所以追奉鑾輿者必思所以安
人心求所以安人心者必求所以安民瘼比雖下詔多
方凡經殘破州縣優加循恤若未盡也可遣使諸路撫
諭及詔川陝城都京兆府京西襄鄧州荆南府江寧府

揚州仰逐漕臣積聚錢糧帥守修治城壘宮室官舍以
脩時巡省觀風俗仍令務從儉約勿致騷擾三省樞密
院奉以施行 解州民邵興據神稷山屢與金人大戰破
其軍邵興字晉卿解州安邑人也靖康時金人攻晉絳興
因起兵為盜人呼為邵大依據解州神稷山屢與金人
戰金人執其弟翼以招之興不顧其弟飲泣死戰大破
金人之軍

六月一日己未朔詔張邦昌一月兩赴都堂 詔曰張

邦昌知幾達變勲在社稷朕置諸論道之地寵以王爵
欲與日引同朝共理萬物而澀懇牢避雅志莫奪朕以
崇德報功憫勞以事而養民保國實賴圖回雖已斷來
章宣赴都堂治事未極褒崇之典考祖宗故實惟元祐
間文彥博以累朝勲德禮絕羣臣一月兩赴都堂平章
重事最為異數今邦昌已降指揮參決大政屬望尤重
可依文彥博一月兩赴都堂仍不限時刻出省急速大
政許宰執同就第議以稱朕優假倚賴之意初邦昌累

請退不許乃降是詔 新除尚書右僕射兼中書侍郎
李綱至南京行在是日李綱到南京行在有旨宣召綱
當赴內殿起居綱奏臣未到行在十里間御史中丞顏
岐封示論臣章疏大意謂張邦昌為金人所喜更宜增
重其禮臣為金人之所不喜宜置之閒地不當為相如臣
愚蠢但知有趙氏不知有金人固宜為所惡然岐之論臣
謂材不足以任宰相則可謂為金人所惡不當為相則不
可臣愚不知金人與趙為仇敵其所以喜者為趙氏耶其

所惡者為趙氏耶且為趙氏之臣而金人喜之此必有以得其心者而反可以為相自古賣國以與人者皆為忠臣矣今陛下斷自淵衷特達用臣而外廷之論如此臣豈敢當此任願乞身以歸田里至於陛下命相於金人所喜所惡之間更望聖慮有以審處上宣諭曰岐嘗有此言朕告之如朕之立亦非金人之所喜者岐無辭而退此不足恤遣御藥局郎成章宣押赴都堂治事

二日庚申李綱進劄子論十事其一議國是其二議巡

幸大畧謂車駕當一到京師見宗廟慰都人之心權時之宜為巡幸之計其二以天下形勢觀之關中為上襄陽次之建康又次之宜詔有司預為之脩其三議赦令大畧謂祖宗登極赦令皆有常式前日赦書一切以張邦昌赦書為法如赦惡逆選人情資責降罪廢盡復官職皆泛濫不可行請改正以法祖宗其四議僭逆大畧謂張邦昌為國大臣不能臨難死節而挾金人之勢易姓建號身處宮禁南而以朝其後勤王之師集迫不得已

乃使奉迎朝廷崇之為三公真王參與大政非是宜正
典刑垂戒萬世其五議偽命大畧謂國家大變故鮮伏
節死義之士而奉敵旨受偽官屈膝於其廷者不可勝
數昔肅宗平賊而汙偽命者以六等定罪今宜倣之以
勵士風其六議戰大畧謂軍政失廢士氣怯惰宜一新
紀律信賞必罰以作其氣其七議守大畧謂敵情狡獪
勢須復來宜於沿河江淮措置控禦以扼其衝其八議
本政大畧崇觀以來政出私門綱紀紊亂宜一歸之于

中書則朝廷尊其九議久任大畧謂靖康間進退大臣
衆多而太速功效蔑著宜慎擇而久任之以責成功其
十議修德大畧以感天人心致中興之業得旨皆留
榻上候詳觀有當施行者降出是日降出議國是巡幸
赦令戰守五劄子餘皆留

三朝北盟會編卷一百四

欽定四庫全書

三朝北盟會編卷一百五

宋 徐夢莘 撰

炎興下帙

起建炎元年六月二日庚申盡四日壬戌

綱議國是奏劄曰臣切以和戰守三者一理也雖有高城深池弗能守也則何以戰雖有堅甲利兵弗能戰也則何以和以守則固以戰則勝然後其和可保不務戰

守之計惟信講和之說則國勢益卑制命於敵無以自立矣景德中契丹入寇罷遠幸之謀決親征之策捐金幣三十萬而和約成百有餘年兩國生靈皆賴其利則和戰守三者皆得也靖康之春粗得守策而割三鎮之地許不可勝計之金幣以議和懲劫寨小衄而不戰於和與戰兩失之其冬金人再入畿甸朝廷以春初固然為守而不知時事之宜膠柱鼓瑟無變通之謀內之不能撫循士卒以死捍敵外之不能通達號令以督援兵金

人既登城矣猶降和議已定之詔以阻四方勤王之師
使敵得逞其欲凡都城玉帛子女重寶圖籍儀衛輦賂
百工伎藝悉索取之次第遣行及其終也刼質二聖巡
幸沙漠東宮親王六宮戚屬宗室之家盡驅以行因逼
臣僚易姓建號自古外蕃之禍中國未有若此之甚者
是靖康之冬并守策失之而卒為和議之所誤也天祚
有宋必將有主故使陛下脫身危城之中總師大河之
外入繼大統以有神器然以今日國勢揆之靖康之初

其不相若遠甚則朝廷所以捍患禦武救寧萬邦者於和戰守當何所從而可也臣愚雖不足知朝廷國論大體然切恐猶以和議為然也何哉二聖播遷陛下父兄沉於敵庭議者必以謂非和將速二聖之患而虧陛下孝友之德故不得不和臣切以謂不然昔高祖與項羽戰於滎陽成臯間太公為羽軍所得其危屢矣高祖不顧其戰彌勵羽不敢害而卒歸太公則不顧而戰者乃所以歸太公之術也晉惠公為秦所執呂卻謀立子圉

以靖國人其言曰喪君有君羣臣輯睦甲兵益多好我者勸惡我者懼庶有益乎秦不敢害而卒歸惠公然則不恤敵國而自治者乃所以歸惠公之術也今有盜賊於此劫質主人以兵威臨之則必不敢加害以卑辭求之則所索彌多往往不可測者何則彼為利謀陵懦畏強而初無惻隱之心故也今二聖之在敵廷莫知安否之審固臣子所不忍言然吾不能逆折其意又將墮其計中以和議為信然彼必欲割地以邀我若予之則可

不然二聖之禍且不測不予之是陛下之忘父兄也予之則所求無厭雖日割天下之山河竭天下之財用山河財用有盡而金人之欲無窮少有釁端前所予者其功盡廢遂當拱手以聽其命而已昔金人與契丹二十餘歲交戰戰必割地厚賂以講和既和又求釁以戰卒滅契丹今又以和議惑中國至於破都城滅宗社易姓建號其不道如此而朝廷猶以和議為然是將以天下畀之敵國而後已臣愚以為過矣為今之計莫若一切

罷和議專務自守之策而戰議姑俟於可為之時何哉
既彼背盟而刼和地不可復予惟以二聖在其國中不
可用兵候其入疆則多方以禦之而攻破城邑徐議收
復建藩鎮於河北河東之地置元帥府若郡於沿河江
淮之南治城壁修器械教水軍習車戰凡捍禦之術種
種具脩使進不得鈔掠退有邀擊之患則雖時有出沒
必不能深入而憑陵三數年間生養休息軍政益修士
氣漸振將帥得人車甲脩具然後可議大舉振兵聲罪

以討之報不共戴天之讐以雪振古所無之耻彼知中國能自強如此豈徒不敢肆克二聖保萬壽之休亦將悔禍畏威而鑾輿有可遷之理倘捨此策益割要害之地奉金帛以予之是倒持太阿以其柄授人借寇兵資盜糧也前既信其詐謀以破國矣今又欲蹈覆車之轍以破天下豈不重可痛哉或謂強弱有勢弱者不可不服於強昔越王勾踐卑身重賂以事吳而後卒復其仇今中國事勢弱矣盍以勾踐為法卑身重賂以事庶幾

可以免一時之禍而成將來之志臣以為不然夫吳伐越勾踐以甲盾三百棲於會稽遣使以行成而吳許之當是時吳無滅越之志故勾踐得以卑身厚賂以成其謀枕戈嘗膽以勵其志而卒報吳今金人之於國家如何哉上自二聖東宮下逮宗室之係於屬籍者悉驅之以行而陛下之在河北遣使降偽詔以求之如是其急也豈復有恩於趙氏哉雖卑身至於奉藩稱臣厚賂至盡天下之財以予之彼亦未足為德也必至於混一區

宇而後已然則今日之後法勾踐嘗胆枕戈之志則可
法勾踐卑身厚賂之謀則不可事固有似是而非者正
謂此也然則今為朝廷計歲時遣使以問二聖之啟居
極所以崇奉之者於金國加兵之時其來攻則嚴守禦
以備之練兵選將一新軍律候吾國勢既強然後可以
興師邀請有此武功以俟將來此最今日之上策也古
語有之曰願與君定國是夫國是定然後語施注措以
次推行上有素定之謀下無趨向之惑天下之事不難

舉也靖康之間唯其國是不定而且和戰議論紛然致有今日之禍則今日之所當監者不在靖康乎臣故敢陳和守戰三說以獻伏願陛下斷自淵衷以天下為度而定國是則中國之功可期矣上大喜付中書省遵守尼堪由河東歸至雲中斡里雅布由河北歸至燕山

三日辛酉李綱奏議張邦昌僭逆及受偽命臣僚乞早降處分李綱傳信錄曰是日李綱奏曰臣愚瞽輒以管見十事仰瀆天聽已蒙聖慈施五事如議本政久任修

德三事無可施行自應留中所有議張邦昌僭逆及受
偽命臣僚二事皆今日刑政之大者乞早降處分上宣諭
曰執政中有與卿議不同者更俟款曲商量臣奏曰邦
昌僭逆之迹顯然明白無可疑者天下皆謂邦昌在金
歲餘厚結金人得其歡心攻破都城遷二聖東宮盡取
親王宗室以行邦昌蓋與其謀此固不可知然邦昌當
道君朝在政府者幾十年淵聖即位首擢為相奉使金
國方國家禍難之時如能以死守節推明天下所以戴

宋之意以感動其心金人未必不悔過而存趙氏邦昌
方且以為得計偃然當之正位號處宮禁者月有餘日
敵騎既退四方勤王之師集邦昌擅降偽詔以止之又
遣郎官分使趙野翁彥國等皆齎空名告數百道以行
迨勤王之師日進邦昌知天下之不與也不得已乃議
奉迎邦昌僭竊本末如此春秋之法人臣無將將則必
誅况邦昌已僭竊罪宜如何陛下欲建中興之業當自
正朝廷始而尊崇僭逆之臣為三公真王參與國政何

以示四方執政中有議論不同者乞降旨宣詔臣得與之廷辯如臣理屈其敢復言上許之乃令小黃門徑就幕次宣召黃潛善呂好問汪伯彥再對上語之故潛善力主之詰難數四方屈服然猶持在遠不若在近之說綱曰邦昌當正典刑何遠近之有借使在近當幽繫而返尊崇之如此何也潛善不能對上顧呂好問曰卿在城中知其詳謂當如何好問曰邦昌僭竊位號人所共知既已自歸惟陛下裁處又引德宗幸奉天不挾朱泚

後以為悔以附會潛善不若在近之說綱曰吕好問之言首尾兩端且援朱泚以為例非是方德宗之狩奉天朱泚盖未反也姜公輔以得涇軍之心恐資以為變請挾以行德宗不聽而其後果然今邦昌之僭逆豈可使之在朝廷使道路指目哉因拉邦昌曰臣不可與邦昌同列陛下必欲用邦昌第罷臣勿以為相無不可者上宣諭曰俟降出卿劄子來日將上取旨

四日壬戌張邦昌責授昭化軍節度副使潭州安置臣

僚上言節義者天下之大閑僭逆者臣子之極惡春秋之義人臣無將將而必誅况已僭位號為天下之所憤怒者哉謹按張邦昌被過道君之朝久參機政際會靖康之日擢冠宰司資其重臣奉使敵帳初無忠義體國之意但知諛佞保身之謀去中國以踰年從敵騎以僭至乃二聖播遷之日無一言營救之忠憑恃金人盜據神器國危而資之以為利君辱而攘之以為榮叨有乘輿安處宮禁降旨以行其僭命南面以朝其偽臣易姓建

邦三十餘日迨金人之既退方降赦以收回考其四日
之手書猶援周朝之故事指瑤華為宋后豈有意於趙
孤逆計顯然文飾拒掩逮知陛下總師於外天人所歸
乃始退還舊班遣使迎奉今乃冒處王爵平章大政極
其褒崇以罪為功臣所未喻今其黨與尚布朝列秋高
馬肥敵騎出沒邦昌挾借其勢陛下不得而制之中夜
以思不寒而慄伏望陛下斷以英哲察其罪惡早正典
刑而肆諸市朝以慰四方忠義之士以為萬世亂臣賊

子之戒六月四日奉聖旨張邦昌僭逆理合誅夷原其
初心出於迫脅可特與貸免責授昭化軍節度副使潭
州安置仍令監司守臣常切覺察日具存在申尚書省
劄付應天府差官判送至府界關報前路官司州軍巡
尉各令互相管牒施行制曰以死償節者臣子之宜求
生害仁者聖人所疾倘或志存於軀命則將義薄於君
親具官張邦昌身受國恩位登宰輔宗社有非常之變
乃人臣思自盡之時而不能抗虎狼強暴之威徒為雀

鼠偷生之計陷於大惡所不忍言雖天奪其衷生愚至此然君異於器大匱可乎宜大正於典刑用肅清於名分尚念本繇於迫脇惻然姑示於矜容爰黜散官竄投荒服其體好生之德毋忘自訟之心 中興姓氏錄叛逆傳曰張邦昌字彥能元符三年以甲科第遷工部尚書使於高麗國王死國人重中國之使權立邦昌為國王後詔還之宣和初為尚書左丞三年遷中書侍郎嘗與童貫議事面折其過士論美之六年貫再領軍往謀

取燕邦昌建議止其行靖康初除少宰俄除太宰隨康王使於金國軍前及康王還京繼隨肅王入金國人多喜之及金人陷京師欲滅趙氏取邦昌至京城外京城留守王時雍等迎合金人之意請立邦昌為帝金人尼堪命邦昌入京百官軍民迎拜於南薰門內邦昌入居尚書省令廳百官軍民會議於尚書省時雍榜曰大金人已定冊立張邦昌太宰有異議夷三族軍民唯唯時雍同徐秉哲呂好問入見邦昌曰金人已滅趙氏欲冊太宰

為君三日不立將夷宗廟生靈邦昌曰身為宋臣豈篡
逆也有死而已時雍等強之邦昌引刀自裁衆人奪之
次日時雍等又逼張邦昌僭位金人遣蕭慶來冊立邦
昌僭皇帝位於京師詔書稱手書聖旨稱面旨宣旨金
人有取赴軍前者先奏然後邦昌懇金人取還馮澥郭
仲荀胡直孺等赦天下死罪已下改國號楚以王時雍
為太宰徐秉哲為少宰李回路允迪知樞密院呂好問
門下侍郎莫俦吳玠同知樞密院及金人退師邦昌即

冊哲宗孟后為大宋皇后俄又請垂簾聽政邦昌復為太宰聞天下兵馬大元帥康王將至南京邦昌上書以自明又遣謝克家奉上玉璽又至應天府來迎王即位加邦昌太傅同安郡王五日一赴都堂參議大事及李綱為相建議宜誅邦昌以戒臣下臣僚亦言其僭乃責授昭化軍節度副使潭州安置賜死時年四十七先是崇寧間望氣者云景州阜城縣有天子氣甚明命開河於邑斷其王氣開後邦昌與劉豫僭位皆阜城人也

偽楚錄曰張邦昌僭位凡三十有三日是時圍城中士大夫或受邦昌偽命或為邦昌利誘故記事多為邦昌文飾者謂邦昌以金人迫脅姑從權以安宗社每不敢有僭逆意蓋邦昌竊位之初未知人心向背故繆為畏避改聖旨為面旨易詔旨為手書姑安衆情其後布寬恤事件以收人心慰撫太學獨厚以收士譽至出辭金人則安然用天子法駕所過設香案官望塵起居並干故事矣如金人四月一日退師之後邦昌尚分衛兵閉守

都城文移中削去靖康年號置修城司專委侍郎邵溥
提領修飾樓櫓方且四散天下止勤王之師外路帥守
書札皆斥其名仍用國寶援藝祖立周太后故事冊隆
祐太后為宋太后又皆金人退師後見諸行事者其僭
逆之迹昭然雖邦昌亦不能文也後見諸路勤王之師
輻湊臺諫交章以陳禍福知中外之情不附又家屬拘
廩廬州方議遣使康邸繼請隆祐垂簾聽政始就臣位
若謂復辟非邦昌之本心則可矣 李綱建炎時政記

曰東京留守司鞠治華國靖恭夫人李氏分事初張邦
昌既僭竊居福寧殿李氏奉之時以果實為獻邦昌亦
厚荅之遂以養女陳氏侍邦昌寢其後邦昌欲退歸府
第因其姊入禁中乃留親隨人易陳氏以出邦昌出禁
李氏送至內東門有語指斥乘輿上聞之命留守司同
御藥院於內東門推治李氏款服且言用乘輿服御及
陳氏奉上宣諭曰邦昌敢居宮禁寢殿姦私宮人可以
見其情狀有李氏決脊降配軍營務下民為妻 秀水

閒居錄曰張邦昌以中書舍人使高麗至明州謁海神廟夜夢神告曰他日當為中國侍郎但不可為秉國大夫後十餘年累拜小鳳靖康改元金人至闕正月九日拜右相後兩日出質於敵營與之俱回燕山次年都城失守金人立為偽楚吳曾漫錄曰張邦昌知汝州一日百姓下狀有曰伏乞上命指揮者邦昌以非人臣所敢當下其人於獄自劾待罪朝廷但以不應為杖其人邦昌無罪迨後僭竊其黨有援此以為開國之祥吁可

怪哉 又論受僞命臣僚 傳信錄曰是日進呈論僞
命臣寮上宣諭曰國家傾覆士大夫不聞死節往往因
以為利如王及之坐藩衍宅門詬詈諸王余大均誘取
內宮嬪以為妾卿知之否臣奏曰自崇觀以來朝廷不
復尚名節故士大夫鮮廉寡耻不知君臣之義靖康之
禍視兩宮播遷如路人然罕有能仗節死義者在內惟
李若水在外惟霍安國死節顯著餘未有聞願詔京畿
諸路詢訪優加贈恤如王及之余大均朝廷見付御史

臺推鞠必得其實臣聞方金人欲廢趙氏立張邦昌令吳玠莫儔傳道意旨往返數四京師人謂之捷疾鬼王時雍徐秉哲奉金人追捕宗戚里令居民結保不得容隱以衣袂聯屬以往若囚繫然其後迫道君東宮后妃親王出郊皆臣子之所不忍言又受偽命皆為執政此四人者宜為首上以詢呂好問而以為有之得旨皆散官安置餘以次謫降內王及之余大均周懿文胡思陳冲等並令御史臺疾速取勘候案到日取旨

三朝北盟會編卷一百五

欽定四庫全書

三朝北盟會編卷一百六

宋 徐夢莘 撰

炎興下帙

起建炎元年六月五日癸亥盡其日

五日癸亥責降王時雍等臣僚上言金人之變而近臣百官有為金人股肱者驅逼二聖太子后妃及搜捕宗室戚屬如王時雍徐秉哲余大均者有為金人之喉舌

傳布命令廢本朝而建偽楚如吳玠莫儔者有因為奸利汚染國戚如王及之者有為偽楚之輔翼總其政事如馮澥李回者有受偽楚之官爵與商議論如李擢孫覲者有肆為惡言以辱本國以諂邦昌或為定冊之儀視之恬然不以為怪如胡思顏博文王紹者除徐秉哲已責授余大均王及之胡思別聽指揮外王時雍等並安置 王時雍責授昭化軍節度使高州安置徐秉哲責授昭化軍節度副使梅州安置吳玠責授昭化軍節

度使永州安置莫儔責授寧遠軍節度副使全州安置
朕惟國家勵名節於百年之餘尊士大夫於衆人之上
非以周旋於閒暇盖將責望於安危苟捐軀殉國之無
人知排難解紛而奚賴具官早緣推擇進躡近班當君
親蒙犯於氛埃至臣子盜稱於神器茲非小變何以生
為乃通命令之往來坐使等威之差借此而濶畧勢不
可容宜寵秩之盡鑄以一官而置散無忘自省尚服寬
恩王紹除名勒停送容州編管李擢責授成州團練

副使柳州安置顏博文責授果州別駕澧州安置孫覲
責授海州團練副使歸州安置並令所在州軍差人管
押前去孫覲辨受偽官等狀曰臣在宿州見報有臣
僚言章稱受偽楚官爵與商議論有如孫覲李擢者奉
聖旨散官安置伏念臣自靖康元年八月和州召還十
月蒙恩召試中書舍人兼侍講資善堂撰文官十二月
初三日權直學士院詔劄具存又因東壁統制官不散
特支例降三官至今尚未率復又自拘執敵營七十餘

日至三月二十三日放還次日便在假即不曾赴中書
後省學士院供職二十七日金人以臣元非放還人數
復見追取雖一時竄匿得免而開封吏卒圍第追捕窘
辱百端憂悸成疾一向家居在假不出直至四月二十
四日陛下行臺至南京有旨推發一應官吏以臣充管
押主寶使二十五日參假受勅太后臨遣徑赴行在所
有前後請假關牒見在中書後省學士院閣門御史臺
可以照驗即不當受官爵及預議論今行遣徙置遠方

實負天下之至寃只緣圍閉以來傳聞失實不知子細一例論列若不陳訴何以自明伏望聖慈將臣三月二十三日以後放罪月日體究指實施行又辭中書舍人狀曰臣頃遇淵聖皇帝即位之日以國子司業擢為侍御史方中國稔陽九之禍而廟堂無一定之謀羣奸興訛匹夫橫議臣冒居言路固無獨見遠慮陪輔聰明而一時誅賞不協公議因事論奏僅能塞責言狂意拙輕犯衆怒怨讟所歸遂成謗藪嘗論故宰相王黼誅死而

蔡京方自拱州請覲大臣游說欲還之賜第以為謀主
宣撫使童貫王安中譚稹皆散官安置而蔡攸乃以大
中大夫提舉宮觀任使居住罪同罰異物議沸騰責在
臣等諫議大夫楊時在延和殿下宣言淵聖有蔡攸無
罪之語以諷臺諫臣獨以為有罪論奏不已於是京攸
之黨惟臣之怨張勸衛仲達以弃官得罪既除削矣又
傳逮詔獄將致之死臣論蔡衛父子兄弟等亦弃官而
去者何為獨置不問於是詔御史臺根究臣等條具衛

等兄弟親戚賓客之棄官者凡數十人上之有旨送大理寺約法而勸等亦賞死於是逃奔守官之人惟臣之怨金人犯闕李綱不忍紛紛欲一戰驅之而幕府吏士皆年少書生縱史以贊其決方元若卓露布以待破敵楚天閭涓刼寨之日漏語於旬日之先都人戶知之臣又論綱素不知兵難以獨任請以諸道兵盡付种師道節制而以綱佐之老者之智壯者之決可幾萬全䟽上不報是日也植三幟於開寶寺傍以待報捷御前又張

御幄於封丘門上以俟車駕臨受俘獲而王師殲焉於
是行營司官屬惟臣之怨又論太學諸生誘衆為亂劫
請人主拜免大臣支解王人流血波道毀撤廬舍取金
幣樂至內訌失今不治他日必有握兵之臣脅制天子
武夫悍卒戕害將帥縣殺其令丞郡殺其守尉以衆暴
寡漸不可長於是太學諸生惟臣之怨臣又論靖康之
政專務姑息大臣掠美嫁怨君父伏闕之後學官待罪
可也仍降詔以獎其忠羣凶懼誅弗問可也乃肆赦以

固其惡行營大臣下行使臣之職收金銀勝以悅衆心
開封尹代摺御之職傳詔太學以沽士譽蔡京責授祕
書監詞臣追數其過宰相甚其言卻之三反竄定無幾
王蕃潛師夜遁召兵於唐州臺諫交章論其罪惡而大
臣以分兵護送家屬之功竟薄其罪主威陵夷必自茲
始於是上自朝廷大臣下至太學官惟臣之怨時方蔽
昵私黨以附下罔上臣獨論刺以忤權貴時方弃涓爵
祿以市恩釣名臣獨矯激以招怨怒羣嘲衆罵恬不知

畏以情罔行卒蹈機穽始則蔡攸黨人呂本中之流作
為痛定等錄奸言以祐其父又崇飾惡語以併中臣終
則言事臣僚又置臣於偽官之內此皆臣積致怨仇以
蹈大難伏遇皇帝陛下普日月之照下雷雨之澤一洗謗
誣深垂簡照 趙子崧奏劄論列王時雍徐秉哲等十
人乞正其罪奏劄曰臣竊謂陛下始初清明萬國歸王
急先務者惟用人而已風俗不厚廉耻道喪未有甚於
斯時也小人既無所守則至於國破主遷亦不以為意

稽首偽朝自謂得計蓋緣平日習與性成不復知義利之分耳今王時雍等盡趨行在意氣揚揚略無忌憚臣聞京城士人藉藉謂王時雍徐秉哲吳玠莫儔范瓊胡思王紹王及之顏博文余大均皆左右賣國逼太上皇取皇子汚辱六宮捕繫宗室盜劫禁中之物公取嬪御都城無小無大指此十人者為國賊此天下之所不赦者也張邦昌未有反正之心敵騎甫退此十人皆日夕締交密謀勸以久服未肆赦問又復督逼之時雍奴事

金人肆出詭計辱君父以安已亡社稷以要功秉哲身
為京尹余大均為少尹助敵為虐分遣捉事人追捕宗
族急於敵兵立賞召人告首必欲搜羅竭盡而後已有
捉事人姓喬姓胡姓韓人尤為殘毒至於拘擠王夫人
於匱坊鎖閉如牢獄捉事人無高下金皆有巨萬之富
矣并傳往來傳金人語言迫脅城中士民舍正從偽邀
請太上皇不容少緩言氣軒轅上皇至泣下范瓊統眾
兵不惜國難弃君狗敵無所不至皇后及東宮將出都

城人號哭遮道願無出瓊斬數人以徇趣車輿以趨敵
砦及之得罪淵聖乃藉敵威以凌侮朝廷不復知有趙
氏為金人搜索宮嬪而擇其美者藏之私家邦昌既僭
號胡思獻赦文曰無湯武之征誅有堯舜之揖遜遜字
直用濮安懿王諱邦昌皇恐以謂不可思曰如今更理
會甚濮安懿王顏博文則曰雖欲避堯之子其如畏天
之威孟子曰以小事大畏天者也蓋陛下在外教邦昌
畏金人而不推奉也至王紹則尤為悖逆其言不可道

竊聞時雍秉哲落職宮祠既未足以正典刑又不足以
安反側使此曹手熟則人主何以立國天下亦失望解
體矣若不付之詔獄考治其罪臣恐小人辨辭飾非奸
惡之狀無以暴白於天下伏望聖慈特降睿旨將十人
付獄鞠治明正典刑上以刷二聖危辱之耻下以謝宗
族驅擄之禍永為萬世臣子之戒臣不勝忠憤 趙子
崧家傳曰子崧字伯山太祖皇帝之六世孫也崇寧二
年貢禮部奏名為第一賜進士出身宣和中除徽猷閣

待制時王黼當國方議平燕鄭公居中領樞密生日士大夫例以詩為壽公因以保全生齒固守歡盟為諷鄭笑曰能保否能守否公曰公能保呼韓足矣鄭深領其言已而任子諒王子飛皆以書論燕事子諒謂巡邊之兵不宜過白溝一步子飛謂當遣辨士往使遼主問金人事使勿諱欲兵助兵欲財助財遼人必感服減歲賜削敵國禮倚以為外藩可又保百年無虞是真得燕也不然我且殆矣公携以見鄭鄭奇二說而黼乃創立尚

書省經撫房几燕事皆專行密院至不與有識危之郭藥師來朝公察其微密語李丞相邦彥曰藥師叛遼歸宋某早見之坐殿門外瞻視非常有輕中國意大則為侯景小則為祿山李相愕然曰子謂何以善其後公曰軍中最黠者張令徽劉舜臣也志不在藥師下今若以燕薊封藥師為廣陽王以檀順封令徽舜臣為節度使許世守如折氏常勝軍授田為業尚可紓禍也明年黼又括諸路出夫錢盜起京東河北天下騷然命初下雖

丞轄亦不與聞公又語李曰自古立大事未有無定論者管仲佐小白霸天下孔明說先主取荆取蜀皆預定計今平燕不先計軍食乃竭四海之力以供無藝之求何可繼也某嘗謂名為平燕實忘河北京東今已取夫錢則實忘天下矣李起握公手曰當為上別白論之已而聞有旨未輸者減半然民已困矣上意頗欲置相一日李問客曰今日孰可相者居士曰無人可相滿坐驚睨不敢答李問其詳公曰里中有病傷寒者一醫汗之一

醫下之外雖支持而中已耗矣謝前醫而訪草澤名士
後至者投一藥則殆乃歸過焉今國勢大槩類此蔡京
倡之王黼成之二十餘年二人者家富於國志得意滿
全身而去天下疾矣公議望公為相公欲如何醫治李
唯唯九月李杲相公與李厚惕然思引除徽猷閣直學
士知淮寧府郭藥師叛金師陷燕山居士即具奏乞留
黃河春夫修城衆笑之未幾敵至牟駝岡游騎過咸平
諸州大震獨陳方興板築兵二萬餘人居此又設三砦

屯於城外收士卒礪器械以示有脩敵至卒馳岡去陳
百里而返先是聞上皇命淵聖為開封牧且有南巡意
任子諒時居陳居士問此舉如何任公曰可危也上果
東下太子留守功成位不益萬一少舛歸罪留守矣居
士曰然非內禪不可任公復乃議以書相意云曰
是某意也丞相能為寇準公能為趙鼎否公曰敢不勉
後兩奉大赦列位宣讀公大慟至不能起明年竭力治
守禦謂敵必大舉自六月後即䟽言畿之西南宜屯兵

為備不然敵且扼吾師絕餉道又曰朝廷不須論三鎮
弃不弃尼堪幹里雅布非爭三鎮實南鄉而爭天下宜大
為之備願詔羣臣毋以同异為論議專以國事為急其
詳見奏議九月四道置都總管公以書曉譬王襄又以
書約顏昌應天蔡顏諸郡緩急相援十月詔下團鄉兵
公牒顏昌壽春府廬蔡舒光斬黃州信陽軍牒曰恭惟
太祖皇帝創業垂統救斯民於五代塗炭之中二百餘
年間淪浹骨髓今天子慈孝恭儉視民如傷夙夜講求

盡復祖宗法度將以便民近者邊境失脩金人再入京
都尚未退師天下之所痛心魚聞敵騎所在唯務殺戮
生靈劫掠財物驅擄婦人焚毀舍屋產業意欲盡使中
國之人父子兄弟夫婦不能相保狼狽凍餒歸於死地
以逞其無厭之心遠近之所共憤疾況朝廷信賞必罰
此正豪傑奮發上報君親下保家室之時當所身兼臣
子情同休戚朝夕疚心不敢少寧須賴隣境犄角輔車
協心戮力以捍敵勢以蕃王室近奉密詔許結集義兵

人自為戰節鉞以下並充賞請諸郡體國事不可緩公文到日各懷忠憤多方措畫廣行招集或素著信義為衆推服或武藝絕倫謀畧可用或胆勇敢死不以軍民世家子弟務在存恤激勸人人自奮知上尊君親下保家室圖富貴免殺戮擄劫之患轉禍為福其利甚大又於靖康元年蠟彈奏狀曰本府自十一月二十四日後來不得京遞道路隔絕敵馬出沒不測自本月初十日以前平安十一月以後諸縣及村落日日被劫赤手獨

捍孤城又以不通京城消息至尊父子在內臣尤激切
痛徹五內竭力守禦以死報國自六月後來奏報不蒙
施行今日果見危急輒募人賫此奏知乞回降平安指
揮以安民心又狀曰右臣自六月後來奏乞加兵嚴守
輔郡累狀不蒙施行今來敵騎深入本府境內攻討日
夜相繼又以京通不通民心疑惑西道總管南通不知
下落今月十一日敵騎至本府城下臣見竭力守禦終
恐無以報國徒有一死仰念至尊在都四面隔絕激切

五內無以效毫髮臣見病心氣脚膝之疾曉夕巡城僅存皮骨輒募人賫此奏知乞回降平安指揮以慰民心臣獲得奸細通說敵志甚大乞聖斷審應毋輕信誤國之言又募張澤隨陳貴賫蠟彈奏狀曰臣今月二十三日開封府百姓陳貴到府稱奉差同張元賫文字至本府及蔡蘄州內張元將帶文字不見陳貴獨到不知處分何事臣所遣統領官趙安十一月二十三日押團結軍民六千餘人前去尋訪張元不見遭敵馬衝散縣尉


二員不知存亡本府自十一月二十五日後來四郊日
遭驚劫屢至城下堅壁固守上下一心竭盡駑力諸縣
及順昌府蔡州縣鎮皆已殘破臣義兼臣子情同休戚
日夕痛心伏乞別降密詔庶幾遵奉臣聞近郡敵騎多
以潰卒為鄉導若朝廷那兵來京畿近郡巢除外敵以
斷糧道其利甚大臣聞胡直孺在黎驛杜常在潁昌范
訥馬忠在南京伏望聖斷責使效命毋令端坐觀蒙又
再遣人賫蠟彈奏狀曰臣於閏十一月二十四日募到

百姓張澤同樞密院差來使臣陳貴賁奏狀前去至十一月初二日張元方到領樞密院十二日聖旨即時差人關報缺鄰郡多方措置招集兵馬外初三日陳貴復回稱

二十五日敵騎攻京師遂致前去不得臣義兼臣子痛心疾首夙夜竄涕恨無捐軀之所臣聞范訥馬忠王淵在應天趙野在單州逐人所將甚衆又聞郭奉世將京東兵到亳州及江南湖北刀弩弓箭手正兵萬數不少皆到宿亳間臣累次遣人間道移文及以書催促趙野

范訥朱勝非併力入援仍責以大義言甚切至臣已激
廬舒頴壽光蔡蘄黃等州發遣勤王人兵到後一併團
結前去臣以道路不通未奉平安詔旨無以自存謹再
募人奏聞伏乞回降指揮以安民心所有本府曲折候
路通續具奏報俄聞二聖出城東都四隣皆陷公乃誓
衆設壇歃血以獎王室勇於奮義力以拒敵其攻脅說
誘日甚公且守且戰愈力首尾半年乃保全孤城以通
諸道勤王之師 康王大元帥奏除寶文閣學士權參

大議張邦昌僭偽首移書訶斥使其反正并以書曉其
偽臣王時雍二書千餘言辭指激切奸謀遂沮又多方
間探京城事跡即令其人供具罪狀以蠟彈赴大元帥
府隔絕之勢遂通而虛實得聞矣



三朝北盟會編卷一百六